

# 唐代洛陽太原道驛程考

嚴 耕 望

中國中古時代，中原北通北塞主要幹道有二，西爲洛陽、太原、雁代道，東爲汴梁、邯鄲、燕薊道。東道坦，西道險。唐都長安，而建洛陽爲東都，太原爲北都，故西道交通大顯重要。然其行  
程無能具體言之者，茲考而出之，以爲讀中古史者之一助。

由東都東北行一百四十里至懷州（今沁陽縣），又北一百四十里至澤州（今晉城縣），又北微東一百九十里至潞州（今長治縣），又北四百五十里至太原府（今晉源縣，舊太原縣），共九百二十里。

太原至東都間之重鎮爲潞州，必爲大道所經無疑。茲就通鑑舉例，如梁大通二年，爾朱榮起兵晉陽，經上黨，河內，渡河橋入洛陽。（卷一五二〇）唐武德三年，突厥遣使潛詣王世充，潞州總管李襲譽邀擊，虜牛羊萬計。（卷一八八〇）開元十一年正月，車駕自東都北巡，經潞州至并州，置北都。（卷二一二〇）開元二十一年，由東都，北巡北都，亦中經潞州。（卷二一三〇）後晉天福元年，石敬塘由太原入洛，中經團柏，至潞州，又南經河陽，渡河至洛陽，（卷二八〇〇）天福十二年，劉知遠起兵太原，欲自石會趨上黨，出天井，抵孟津。（卷二八七〇）此皆其證。潞州以南則澤、懷也。爲大道所經，俱詳後文。今就通典、元和志、寰宇記之太原府、潞州、澤州、懷州、河南府各條所記里程表列如次：

	太原至東都	太原至潞州	潞州至東都	潞州至澤州	澤州至東都	澤州至懷州	懷州至東都	其他
通典	885	450	460	190	280	140	140	河南府北至澤州280里
元和志		450	470	190	280	140	150	澤州北至太原府大路610里
寰宇記	890	450	470	149(誤)	187	140	140	河南府北至澤州280里

據此，太原至東都之總距離似爲八百九十里之譜，觀元和志澤州條云北至太原府大路六百一十里，而澤州至東都二百八十里，無異說，其和正爲八百九十里。然累積各府州間之距離計之，則當爲九百二十里，而潞州北至太原南至東都之和亦爲九百二十里或九百一十里。蓋記錄資料先後有參差耶？今姑以累計之數爲準，以便下文各小據點里數之計算。又按潞州東北爲儀州，西北爲沁州，皆可至太原府，然三書所記太原、儀州、潞州線及太原、沁州、潞州線多者六百里以上，少亦五百里以上，故知潞州至太原驛道四百五十里者，不經儀、沁也。

其詳細行程可考獲如次：

出洛陽上東門，東行經積潤驛，石橋店，蓋三十餘里；折北行渡河至河陽。又由洛城東北行三十里至白馬坡，又名白司馬坂（今白坡），亦至河陽。

新一三六李光弼傳，光弼至東都，史思明來逼，「遊騎至石橋。」光弼度不能守，乃悉軍趨河陽。「諸將曰，並城而北乎？當石橋進乎？」光弼曰，當石橋進。……賊不敢逼。」是洛陽至河陽有兩道：其一東經石橋，其一由洛城東北直趨河陽也。就此事度之，東經石橋當爲主線。石橋在唐洛陽上東門東約三十餘里，即漢代上東門故地；其西有積潤驛。並詳唐兩京館驛考（刊見唐史研究叢稿）。又蘇氏演義：「今洛陽石橋店東十里已來大道之北當高山。山巔有一塚，乃杜預塚也。首陽北望，正與河陽城相對，北去河陽二十餘里。」則石橋有店。據元和志五，河陽西南至洛八十里，偃師西南（西）至洛七十里，首陽山在偃師西北二十五里。則前撰兩京館驛考推測石橋在唐洛陽東三十餘里，益可信。

舊五代史二六唐莊宗紀，天祐八年二月，「庚午，梁祖在洛，聞王師將攻河陽，率親軍屯白馬坡。」此白馬坡必當洛陽河陽道。檢通鑑二六七梁乾化元年紀，書此事作白司馬坂。按白司馬坂屢見唐史。如舊太宗紀，貞觀十一年九月，「河溢，壞陝西河北縣，毀河陽中潭〔潭〕，幸白司馬坂以觀之。」又通鑑一八二隋大業九年，楊玄感反，攻東都，「使弟積善將兵三千自偃師南，緣洛水西入。玄挺自白司馬坂逾邙山南入，玄感將三千餘人隨其後。……玄挺直抵太陽

門……玄感屯上春門。」胡注：「自司馬坂在邙山北，邙山在洛城北。」又云隋洛州「東面三門，北曰上春，中曰建陽，無太陽門，當考。……劉仁軌河洛記，東都羅郭東面北頭第一曰上春門，唐改曰上東門。」自司馬坂亦卽白馬坡無疑，在洛陽東北至河陽道中。復考通鑑一五一梁大通元年，「（魏）丹楊王蕭贊聞竇寅反，懼而出走，趣白馬山，至河橋，爲人所獲。」當卽一地，坡阪在山下耳。紀要四八，自司馬阪在府東北三十里，邙山東北垂也。一統志河南府山川目，同。

又冊府一一四，後唐明宗屢幸白坡，且曾祭突厥神於此。地近邙山。申報館新地圖，洛陽北有白坡，正當孟津道，卽唐之白司馬阪、白馬坡無疑。

河陽城在大河北岸，（今孟縣南十五里。）唐末置孟州。南臨盟津，去東都七八十里。晉杜預造浮橋於此，爲南北交通要衝。魏孝文都洛，於盟津北岸，築北中郎府城，爲京師之後衛。東魏又於南岸及中流沙潭築城，稱爲南城，中潭城，並北城爲三，南北呼應，以與西魏相拒，爭洛陽之控制權。唐代浮橋規制宏壯，爲當時第一大橋，連鎖三城，爲南北交通之樞紐。渡橋而南，臨拊洛京，在咫尺之間。渡橋而北，直北上天井關，趨上黨、太原；東北出清臨關，達鄆城、燕、趙；西北入軻關，至晉、絳。誠爲中古時代南北交通之第一要津。顧祖禹曰：「河陽蓋天下之腰膂，南北之噤喉，」「都道所轄，古今要津。」是矣。故爲兵家必爭之地，天下有亂，常置重兵。隋及唐代前期置關於中潭，曰河陽關。安史亂後，中原多事，更置河陽三城節度使，屏障洛京，兼制北道，故李吉甫稱爲「都城之巨防」也。

河陽孟津浮橋 元和志五，河南府，「河陽縣西南至府八十里。」會昌三年置孟州，治河陽，見兩志。寰宇記五二，孟州，「西南至西京七十里。」疑寰宇記就捷徑言，元和志就石橋驛道言之歟？

孟州因孟津受名，孟津卽盟津，以武王伐紂會盟八百諸侯於此而名垂史冊。河陽之名始見於春秋僖公二十八年，云「天王狩于河陽。」漢置河陽縣。寰宇記五二，孟州河陽縣，「今縣西北三十五里有古城，卽漢理所。」則非唐之河陽矣。紀要四六，以爲唐河陽縣孟州治，卽漢之河陽，誤。

通典一七七河南府河陽縣條云：

「河陽，古孟津、後亦曰富平津，在其南，謂之陶河渚。魏尚書僕射杜君畿試船沉沒之所。……浮橋即晉當陽侯杜元凱所立。後魏莊帝時，梁將陳慶之來伐，駐洛陽，渡河守北中府城，即此；孝文太和中築之。齊神武使潘樂鎮於此，又使高永樂守南城以備西魏，並今城也。其中潭城本東魏所築，仍置河陽關。」（參看水經注五。）

是浮橋即在孟津。按杜畿試船沒於陶河，亦即孟津，事見三國魏志一六本傳。畿之孫預。晉書三四杜預傳云：

「預又以孟津渡險、有覆沒之患，請建河橋于富平津。議者以爲殷周所都，歷聖賢而不作者，必不可立故也。預曰，造舟爲梁，則河橋之謂也。及橋成，帝從百僚臨會，舉觴屬預曰，非君，此橋不立也。對曰，非陛下之明，臣亦不得施其微巧。」

據此，晉以前雖歷代爲津渡之要，但不建橋，而此橋建成亦空前之津梁工程，故君臣大會，預有「微巧」之言也。通鑑八五晉惠帝太安二年，成都王穎等起兵向洛，「列軍自朝歌至河橋，鼓聲聞數百里。帝親屯河橋以禦之。是南北用兵，此橋見重之始。其後歷代用兵，事涉洛陽者，無不爭此橋之控制權。紀要四六河南重險條已詳徵引。既爲兵家所爭，故史事所見，屢圖破壞。如通鑑一七二，陳太建七年，周主攻齊，拔河陰及洛口城，「縱火焚浮橋，橋絕。」此攻者欲壞之也。又通鑑二八〇後晉天福元年，晉主南下，唐主命將「守河陽南城，遂斷浮橋，歸洛陽。」此守者欲壞之也。然屢廢亦屢建。唐六典七工部之水部郎中條云：

「臣梁十有一，皆國工修之。……河陽橋船於潭洪二州造送，……河陽橋置水手二百五十人，大陽水手二百人，仍各置木匠十人。」

又元和志五云：

「河陽縣……浮橋架黃河爲之。以船爲脚，竹簷瓦之，……船簷出洪州。」此兩條見唐代此浮橋之結構與規模之大，非他橋所能及。

至於河陽城及浮橋之正確位置：元和志五河陽縣目中潭城條記浮橋事。又於偃師縣目云：「盟津在縣西北三十一里。」檢寰宇記五二孟州河陽縣，「南浮橋

在縣南一里，卽太始十年杜預造。」同書五偃師縣，「盟津在縣西北三十一里。河東逕小平縣，俗謂之小平津，……河於斯有盟津之目。昔武王伐紂，諸侯不期而會者八百，故曰盟津，亦曰富平津。」（按「河東逕」以下，乃仍水經注語。）蓋浮橋北端在河陽城南一里，南端則在偃師縣西北三十一里。舊志，孟州「本河南府之河陽縣，……城臨大河，長橋架水，古稱設險。」唐會要七〇，略同。卽此浮橋矣。則河陽城幾緊迫黃河北岸可知。至其今地，元大一統志一二三孟州古蹟條，古三城在河陽縣南十五里。」又云，「盟津在今河陽縣南十里。」檢元史地理志：「孟州，唐置河陽軍，又升孟州。……至大定中爲河水所害，北去故城十五里築今城，徙治焉。故城謂之下孟州，新城謂之上孟州。」（據一統志懷慶府卷檢。）故元一統志云然，所謂「十里」者，奪「五」字耳。按上孟州新城卽今孟縣，則唐河陽縣在今孟縣之南十五里，南臨大河處，河上架浮橋爲南北津梁之要也。

河陽三城 元和志五河南縣，至德（當作乾元）中，史思明寇東都，李光弼度不能守，乃「東守河陽三城，拒逆賊，賊……不敢犯宮闕。……故自乾元以後常置重兵，貞元後，加置節度，爲都城之巨防。」按新六四方鎮表，建中二年，「置河陽三城節度使。」此職終唐世不廢，歷任人選可考，詳吳廷燮唐方鎮年表卷四。所謂三城者，前引通典，河陽城卽魏孝文帝所築之北中府城，又有南城、中潭城，皆東魏所築。檢水經河水注：「河水又東逕平縣故城北，……俗謂之小平也，有高祖講武場。河北側岸有二城相對，置北中郎府，徙諸徒棣府戶並羽林虎賁領隊防之。」通典蓋卽承此爲說；但明指其爲唐河陽城耳。寰宇記五二，孟州治河陽，「北中府城卽郡城也。洛陽記云，太和二十年造北中府。又有南城與縣接，乃東魏元象二年所築。」是亦以唐河陽城卽魏北中府城也，但引洛陽記，詳其年代。

中潭城 潭者水中沙丘也。就河中沙灘築城，是渭中潭城。中古時代，黃河中潭城有二。一在蒲州。通鑑一八四，隋義寧元年，朝邑法曹靳孝謨「以蒲津、中潭二城降。」是也。其一則在孟津。通鑑一七二陳太建七年，周主拔齊河陰、洛口城，「縱火焚浮橋。」齊將傅伏「自永橋夜入中潭城。周人旣克南城，

圍中潭。」又一八八，唐武德三年，魏郡「李商胡聚五千餘人，據孟津中潭。」舊紀，貞觀十一年九月，「河溢，……毀河陽中潭（潭），幸白司馬阪以觀之。」（潭爲潭之譌，新紀同誤。惟新三六五行志不誤。）及下引李光弼時事，皆是也。元和志五，河陽「中潭城，東魏孝靜帝元象元年築之，仍置河陽關。天寶以前亦於其上置關。」按魏書五八楊播傳附倪傳：「元顥內逼，……孝莊徙御河北，……顥令蕭衍將陳慶之守北中城，自據南岸。有夏州義士爲顥守河中渚，乃密信通款，求破橋立效……爲顥所害。」此事在孝莊帝永安二年，即梁中大通元年。通鑑一五三此年紀即據魏書述之云，陳慶之以元顥入洛，「爾朱榮與顥相持於河上。慶之守北中城，顥自據南岸，……有夏州義士爲顥守河中渚。」胡注：「水經注曰，河中渚上有河平侯祠。……意此中渚即唐時河陽之中潭城也。」是矣。然此事在東魏元象二年之前十年，蓋築城前早已爲兵家所重，爲守禦要害也。一統志懷慶府古蹟目，「洪邁容齋隨筆，河中一洲名曰中潭，上有河伯祠，水環四周，喬木蔚然。嘉祐八年秋，大水懷襄，了無遺跡，中潭由此遂廢。明統志，中潭城今來灘。（按元大一統志殘卷一二三已有此說。）縣志，即今黃河中郭家灘。」

南城 元和志五河陽縣，「南城在縣西，四面臨河，即孟津之地，亦謂之富平津。」此似在河陽城西甚近，不在大河南岸。前引寰宇記亦云，「南城與（河陽）縣接。」似亦即在北岸。然通鑑一五八，梁大同四年，「（宇文）泰進軍瀍東，……軒騎追（侯）景至河上。景爲陣，北據河橋，南屬邙山，與泰合戰。泰……擊東魏兵大破之。……高敖曹單騎走投河陽南城守將北豫州刺史高永樂閉門不受，……追兵至，敖曹伏橋下，……追者斬其首去。」胡注：「河陽南城在河橋南岸，北岸即北中城。」是也。是南城不但在南岸，而且即在長橋之南端。前引通鑑陳太建七年事，齊人既克南城，遂圍中潭。後晉天福元年，唐主憚晉兵之強，遂斷浮橋守南城。亦皆南城在南岸之證。下引李光弼事，亦見其然。蓋元和志、寰宇記誤書耳。前引水經注：「河北側岸有二城相對，置北中郎府。」云云。似北岸本果有兩城，其一亦有南城之目歟？故志、記承襲舊籍記載，皆有此誤，然非北朝末期至唐代之南城也。且志云「四面臨河」，似

當是說中潭城者，亦非南城形勢也。

唐代河陽三城之見重，始自李光弼守河陽以控東都。舊一〇李光弼傳（參舊一三二李抱玉傳、新一三六李光弼傳、通鑑二二一乾元二年紀）云：光弼入東都，度不能守，乃引軍東北屯河陽，史思明不敢犯宮闕，頓兵白馬寺，與光弼相拒。下文述戰事云：

「十月賊攻城。……光弼謂李抱玉曰，將軍能爲我守南城二日乎？……過期而救不至任棄也。抱玉……守南城……殺傷甚衆。……光弼自將於中潭城，城外置柵，柵外大掘塹，闊二丈，深亦如之。周摯捨南城，併力攻中潭。光弼命荔非元禮出勁卒於羊馬城以拒賊。……元禮……令軍中鼓譟出柵門，徒搏齊進，賊大潰。周摯復整軍押北城而下，將攻之，光弼遽率衆入北城。……一鼓而賊大潰，斬萬餘級，生擒八千餘人。……思明不知摯等敗，尙攻南城，光弼悉驅俘囚臨河以示之，殺數十人以威之，餘衆懼，投河赴南岸，光弼皆斬之。」

此南、中、北三城由南而北次第分明。通鑑二二一記此次攻守，又云：「思明怒，列戰船數百艘，泛火船於前而隨之，欲乘流燒浮橋。」光弼設計，叉其火船，使自焚，不得進。又「叉拒戰船，於橋上發礮石擊之，中者皆沉沒。」亦見橋與三城爲近，與前引高敖曹事亦相應。

河陽關 御覽一六一引冀州圖經：「河陽在河內郡南六十四里，有宮有關。」此殆河陽關之最早見者。通鑑一八五，唐武德元年紀有河陽都尉獨孤武都（隋書恭帝紀作河陽郡尉，字謙。）按隋制，關置都尉，如潼關有都尉也。知河陽亦置關。唐天寶以前亦於中潭置關，見前引元和志。新志亦云河陽縣有河陽關。元大一統志一二三孟州古蹟目，「河陽關在河陽古縣城南，遺跡猶存。」此關當驛道，六典之制，當爲中關；然六典六，中關十三，無河陽。蓋其時承平，

常熟未置耳。徵示葛王，凡六……。善莫存于三德，忠以示葛王，勇以備敵。

<sup>①</sup> 総上而言，河陽城即北城，亦即魏世北中府城，在今孟縣南十五里，南臨大河。

北岸。南城在大河南岸，與北城南北相望。河中有渚，置中潭城，且置關，名

… 河陽。長橋架水，卽所連鎖三城者。大蘇隱無以勝黃。里翁十歸恨更難

交通軍事要衝 河陽直北踰天井關趣潞州、太原，即本篇所考之道也。河陽東北達鄴城、燕、趙，此亦爲自古幹道，不待言。杜翁後出塞五首（詳注四），爲出兵赴幽州、漁陽而作。詩云：「朝進東門營，暮上河陽橋，落日照大旗，馬鳴風蕭蕭。」王宏從軍行（全唐詩一函八冊）云：「十五學劍北擊胡，羌歌燕筑送城隅，城隅路接伊川驛，河陽渡頭邯鄲陌。」皆云由洛陽出發，經河陽至燕趙也。此類事證至多，不可枚舉。且河陽三城爲軍家必爭之地，前引諸史料已可見。讀史方輿紀要四六河南重險河陽三城條更列舉數十事。其北趨上黨、太原，東北走鄴城、燕、趙，亦皆可於其所舉史例見之，不再贅。所未舉證者，河陽西北經軺關至晉、絳道耳。下條續考之。顧祖禹曰：「河陽蓋天下之腰膂，南北之噤喉也。三城記，河陽北城南臨大河，長橋架水，古稱設險。南城三面臨河，屹立水濱。中潭城表裏二城，南北相望。黃河兩派貫於三城之間，每秋水泛溢，南北二城皆有濡足之患，而中潭屹然如故，自古及今，常爲天造之險。」又云：「都道所躉，古今津要也。」是矣。

河陽東北行約六七十里至懷州治所河內縣（今沁陽縣）。北魏末期，道中置高頭驛。按懷州治河內，西南至東都一百四十里，則河陽至懷州非七十里即六十里。洛陽迦藍記一永寧寺條，爾朱榮舉兵，太后遣都督李神軌、鄭季明等領衆五千鎮河橋。……榮過河內，至高頭驛，……神軌、季明……開門降。」則其時河陽、河內間有此驛也。

懷州東北行臨晉關道，經鄴城至趙、幽，爲東北交通幹線，詳另文。懷州直北天井關道則今考之道也。其行程如次：

懷州北行十五里至雍店，又五里至萬善，又十里入太行陘，經科斗店，至天井關。

關於此段路線，觀通鑑二四七會昌三年紀述討澤潞劉稹事，最能得其詳。紀云：

「河陽節度使王茂元以步騎三千守萬善。……六月，王茂元遣兵馬使馬繼等將步騎二千軍於天井關南科斗店，劉稹遣衙內十將薛茂卿將親軍二千拒之。……八月……甲戌，薛茂卿破科斗寨，擒河陽大將馬繼等，焚掠小寨十七，距懷州纔十餘里。茂卿以無劉稹之命，不敢入，（胡注言不敢入懷州。）…

…王茂元軍萬善，劉稹遣牙將張巨、劉公直等會薛茂卿共攻之。期以九月朔圍萬善。乙酉，公直等潛師先過萬善南五里，焚雍店，巨引兵繼之，過萬善，覩知城中守備單弱，欲專有功，遂攻之。日昃，城且拔，乃使人告公直等。……會日暮，公直等不至，巨引兵退，始登山，（胡注：登太行阪也。）微雨晦黑，自相驚，……墜崖谷死者甚衆。……九月……丙午，……王茂元薨，……王宰……以忠武節度使將萬善營兵。……時王宰軍萬善，……顧望不進。十二月丁巳，宰引兵攻天井關……遂克天井關，守之。……戊辰，王宰進攻澤州。」

據此，由懷州北上經雍店，在州北不遠處，又五里至萬善，上太行山，經科斗店，至天井關，入澤州，路線甚詳。而萬善爲要地，在山南不甚遠。下文會昌四年三月，李德裕曰，「今王宰久不進軍，請徙劉沔鎮河陽，仍令以義成精兵二千直抵萬善，處宰肘腋之下。」云云。又通鑑二五五，中和四年，「二月，（李）克用將蕃漢兵五萬出天井關，河陽節度使諸葛爽辭以河橋不完，屯兵萬善以拒之。」新五代史一八七諸葛爽傳略同。皆見萬善爲懷州以北，天井關以南之軍事要衝。檢九域志二，河內有萬善鎮。一統志懷慶府關隘目，萬善鎮「在河內縣北二十里」。按元和志一六，懷州河南縣，太行山在縣北二十五里，太行陘在縣西北三十里。寰宇記五三，同。則一統志之萬善鎮殆即唐宋舊地無疑。一統志云舊有驛。紀要四九亦云今爲萬善驛。疑唐世已置。寰宇記五三，武德縣目引郡國縣道記云，「武德有故雍城，在縣西北三十五里。」一統志懷慶府古蹟目云，雍城在河內東北。按元和志，武德縣西至河內四十七里。（寰宇記作西南四十七里。）則武德西北三十五里，正當在河內東北也。北去萬善五里，則西南至河內當十五里耳。與前引通鑑一節情勢正合，即唐之雍店無疑。一統志又云，雍城「周初雍國。左傳，鄧雍曹滕，文之昭也。注，雍國在山陽縣西。後漢書郡國志，山陽邑有雍城。水經注，長明溝水逕雍城南，寒泉水逕雍城西。京相璠曰，今河內山陽縣西有故雍城。魏書地形志，州縣有雍城。」則此一小地名固有久遠歷史也。科斗店別無可考。寰宇記五三，武德縣有南北斗城。引冀州圖云：「南斗城在今縣北三十里，北斗城在縣北五十一

里。」樂史疑卽雍城。今按北斗城疑卽通鑑之科斗城，非雍店、雍城也。

太行陘濶三步，長四十里，至險峻，古所謂羊腸坂者，此其一。陘道蓋循丹水河谷北上，故又名丹陘。入陘過白水交，蓋向西北折入白水河谷，至天井關，一名太行關，關南有天井泉三所，故名。關當山道最高處，在澤州治所晉城縣南四十五里，南去懷州蓋九十五里。關北不遠卽出山，凡二十五里至馬牢關。又二十里至晉城（今縣）。又由白水交仍循丹谷，稱爲（天井）關之東谷，亦至晉城，但非大道。

漢地志，上黨郡高都縣有天井關。是爲此關見史之始。通鑑一〇八晉太元十九年紀，胡注引蔡邕曰：「太行山有天井關，在井北，遂因名焉。」後漢書章帝紀，元和二年，李賢注：「天井關在今澤州晉城縣南今太行山上，關南有天井泉三所。」通典一七九澤州晉城目，與李注同，惟「關南」作「關前」。元和志一五澤州晉城縣，「天井故關一名太行關，在縣南四十五里太行山上。」寰宇記四四澤州晉城縣，「天井關一名太行關，在太行山上。」天井泉在天井關之南，泉有三所，極大，至深莫測。」紀要三九，云天井關在太行山頂。蓋可信，故李賢、通典、元和志諸書皆云在山上也。按元和志云關在縣南四十五里。又云，太行山在縣南四十里。寰宇記，山在縣南三十六里。則關北不遠卽出山。蓋山西乃高原地區，故太行南麓甚低，而北麓去山頂固不遠也。

馬牢關 舊五代史二五後唐武皇紀，唐大順元年，汴將李謙急攻澤州。」李存孝自潞州來救。「李謙收軍而退。大軍掩擊至馬牢關，斬首萬餘級，追襲至懷州而還。」通鑑二八五作馬牢山。蓋因山置關也。此山關當在澤州城至天井關道上。紀要四三，馬牢山在澤州東南。一統志澤州山川目，馬牢山在鳳臺縣南二十里。鳳臺卽唐之晉城。則此關在天井關北約二十五里也。

太行陘 元和志一六懷州河內縣，「太行陘在縣西北三十里。……濶三步，長四十里。」並引述征記，爲太行八陘之第二陘。寰宇記五三，同。其險峻可以想見。（通鑑五胡注引括地志，太行山在懷州河內縣北四十五里。蓋陘自山口算起。）按古稱地險有羊腸坂者，其他有三。紀要三九山西重險天井條云：

御製文「關」（天井關）之南卽羊腸坂道。孔穎達曰，太行有羊腸坂，南屬懷，北屬一十五澤，呂氏春秋九山之一也，盤紆如羊腸。魏世家，如耳曰，昔者魏代趙，斷

羊腸，拔闕與。又蔡澤謂應侯曰，君相秦，坐制諸侯，決羊腸之險，塞太行之道。韓非說秦王，西攻修武，逾羊腸，降代上黨。又王莽謂五威將軍王嘉曰，羊頭之阨，北當燕趙，羊腸天井，險蓋相因也。通釋，羊腸有三。一在懷澤間，即太行坂道也。一在潞安府壺關縣東南百里。戰國策，樊餘謂楚王，韓兼上黨以臨趙，即趙羊腸以上危。又蘇廣遺趙王書，秦以三郡，攻王之上黨，羊腸之西非王有。漢志，壺關縣有羊腸坂，是也。一在太原西北九十里。吳起曰，夏桀之居，伊闕在南，羊腸在北。淮南子注，太原西北有羊腸，通西河上郡關。」（本注：隋書，煬帝登太行，問崔頤，何處有羊腸坂？曰漢書志在上黨壺關縣。帝曰，不是。又答曰，皇甫士安撰地書云，太原北九十里有羊腸坂。帝曰是也。）

據此，懷澤間太行坂道即三羊腸之一，即此太行陘道也。元和志云濶三步，長四十里，真標準之羊腸道矣。（紀要四二，壺關羊腸坂才三里。一統志同。）又據上引諸條所記里程，則懷州北行三十里即入太行陘，陘盡四十里，又二十五里天井關，又五里或十里出山，山道凡七十餘里。考水經注九沁水注云：

「丹水……出上黨高都縣故城（按在今晉城縣東北）東北阜下，俗謂之源源水……丹水自源東北流，又屈而東注，左會絕水。……絕水出泫氏縣（按今高平縣）西北楊谷……東南入高都縣，右入丹水。……丹水又東南流注于丹谷。……晉書地道記曰，縣有太行關，丹溪爲關之東谷，途自此去，不復由關矣。丹水又逕二石人北，而各在一山，角倚相望，南爲河內，北曰上黨，二郡以之分境。（按寰宇記四四，晉城「石人山，在縣東南八十八里，有雙石高標，類人形。」殆即此。）丹水又東南歷西巖下，巖下有大泉湧發，洪流巨輸，淵深不測，蘋藻菱芹，竟川含綠，雖嚴辰肅月，無變暄蕪。丹水又南，白水注之。水出高都縣故城西，所謂長平白水也。東南流歷天井關。地理志曰，高都縣，有天井關。蔡邕曰，太行山上有天井關，在井北，遂因名焉。故劉歆遂初賦曰，馳太行之險峻，入天井之高關。……白水又東，天井溪水會焉，水出天井關北，流注白水，世謂之北流泉。白水又東南流入丹水，謂之白水交。丹水又東南出山，逕鄧城西，城在山際。……丹水又南…

…注于沁，謂之丹江。」（下文述沁水過河內縣北。）

據此所記，可作簡圖如次：



是河內北入山區之太行陘，當行丹水。紀要四九，河內太行山條，「府西北三十里曰太行陘，一名丹陘。」蓋卽循丹水而行，故有丹陘之名。然天井關實當白水河谷；而丹溪僅爲關之東谷，雖可通行，非大道。蓋由河內循丹水河谷而

上，至白水交之北，大道取白水河谷至天井關，達高都故城，即唐以下之澤州治所晉城縣也。又按酈注此條有丹谷丹溪之名，爲天井關之東谷，亦可通行。考魏書孝莊帝紀，永安三年，帝誅爾朱榮。遣源子恭「鎮太行丹谷，防討世隆。」世隆陷建州（唐之澤州），爾朱兆自晉陽來會。「兆寇丹谷」，子恭兵敗，兆遂渡河。此丹谷殆即天井東溪歟？然亦可指太行陘。

是此太行山道凡七十餘里，南四十里爲太行陘道，北三十餘里爲天井關道。乃晉豫交通之巨險，亦爲自古南北交通要道，南北用兵，必爭取此山道之控制權。其重要性蓋居太行八陘之首。誠以南瞰大河，凌逼洛京，故爲兵家所必爭也。

按太行八陘，見重於史者，當以太行、井陘、軍都爲最，然井陘關鍵晉、冀，軍都北通塞外，皆偏於東北，不若太行陘俯瞰大河，直脅洛京，河洛爲中原心臟地帶，故此陘尤爲見重也。通鑑五，周赧王五十二年，「秦武安君伐韓，取南陽，攻太行道，絕之。（胡注，韓之南陽即河內野王之地。）蓋取南陽而不絕太行道，則南陽亦不能守。又二四七，唐會昌三年，李德裕奏：「俟昭義平日，仍割澤州隸河陽節度，則太行之險不在昭義，而河陽遂爲重鎮，東都無復憂矣。」蓋東都以河陽爲屏障，而河陽之軍非據太行之險，仍不爲安全也。至於中國史上軍家爭取此處陘道之其他事例，紀要三九山西重險天井條及四六河南名山太行條已搜錄幾盡，茲不復贅。

此道既險而要，隋煬帝及宋太祖皆曾修鑿，唐世可能亦曾加工。

隋書煬帝紀，大業三年，五月「戊午，發河北十餘郡丁男鑿太行山，達於并州，以通馳道。」蓋其時車駕北巡也。歸途上太行山，開直道九十里至濟源（詳下文），蓋非太行陘道矣。又宋會要方域一〇之一，太祖建隆三年「五月十八日，潞州言先奉詔集丁夫開太行路，俾通餽運，今已功畢。」蓋爲北征北漢之準備耳。按唐世未見修鑿，然高宗玄宗不止一次由洛陽北巡潞、并，想當亦有經營也。

又河陽西北經濟源入軼關。而濟源東北亦有山道通澤州，蓋亦經天井關地區。

寰宇記四四澤州目，除記「南至懷州一百四十里」外，又云，「西南至孟州濟源縣一百五十里。」按濟源河陽道另詳軼關道考。是澤州又可取道濟源至河陽

入東都也。檢通鑑一八〇，隋大業三年，北巡回。「帝上太行，開直道九十里。九月己未，至濟源，幸（張）衡宅。」（參隋書張衡傳。）胡注，「開直道抵張衡所居。」天井關去澤州四十五里，則上太行，開直道者，當始途於天井以西不遠處，向西南直抵濟源也。寰宇記所記澤州至濟源道，可能與煬帝所開者有關。一統志澤州關隘目，引通志，以爲煬帝所開即今小口道。

晉城東北行，中經巴公原（今有巴公鎮）八十里至高平縣（今縣）。

新一八二盧鈞傳，會昌間，爲山南東道節度使，遷昭義節度。「鈞次高平。」是高平當入潞州大道。又通鑑二九一，後周顯德元年，北漢主南侵，昭義節度使李筠嬰城自守。三月，「乙未，帝發大梁，庚寅至懷州，……壬辰過澤州，宿於州東北。北漢主不知帝至，過潞州不攻，引兵而南，是夕，軍於高平之南。癸巳……北漢主以中軍陳於巴公原，張元徽軍其東，楊袞軍其西。……合戰，……北漢兵大敗。……是夕，帝宿於野次。甲午，休兵於高平。……丁酉，帝至潞州。」則由澤州東北行經巴公原至高平也。又通鑑二六六，梁開平二年，周德威自潞州攻澤州，梁軍來援，「德威焚攻具，退保高平。」及下文韓店條引舊五代史，亦皆高平當大道之證。元和志一五澤州，高平縣南至州八十里。寰宇記四四，同。巴公原，一統志澤州關隘目引金史地理志，晉城縣有巴公鎮。又引舊志，「巴公鎮在州北四十四里。」而紀要四三作州北三十五里。

又北約七十里至韓店（今有韓店）。又四十里至潞州治所上黨縣（今長治縣）。又高平縣北五十里有長平關，似亦當大道，則在韓店之南二十里。

舊五代史五二唐書李嗣昭傳，嗣昭攻潞州，梁澤州刺史棄城走。「梁祖聞嗣昭之師大至，召葛從周謂曰，并人若在高平，當圍而取之，……勿以潞州爲敵。及聞嗣昭軍韓店。梁祖曰：進通扼八議路，此賊決於我門。」此既見高平當道，亦見韓店當道。一統志潞安府關隘目，「韓店鎮，在長治縣南四十里。明洪武元年，洪霍特穆爾遣韓禮兒援潞安，偏將軍楊爆遇於韓店，大戰敗之。」據嗣昭傳，唐世已有此名，當大道也。今國防研究院地圖仍有韓店，在汽車路上。按澤潞間相去一百九十里，高平南至澤州八十里，韓店北至潞州四十里，推知

高平韓店間里數。又李嗣昭傳梁祖之語不可解。一統志同目有「八義鎮，在長治縣西南六十里，見金史地理志。」所謂「八議道」者，蓋此八義歟？長治西南六十里，似與下文所述長平關相近矣。

又元和志一五澤州高平縣，「長平關在縣北五十一里。」寰宇記四四澤州高平縣，引冀州圖云，「長平關在縣北五十里。」就方向言，蓋當大道。元和志又云，「長平故城在縣西二十一里，自起破趙四十萬衆於此，盡殺之。」一統志澤州古蹟目引舊志，「在縣西北二十里王報村，今猶稱舊縣。」而寰宇記云：「省窪谷東西南北各六十步，在縣西北二十五里，秦壘西面百步。即趙括被殺，餘衆四十萬降白起之處，懼趙變，盡坑之。……地名殺谷，唐開元十年正月明皇行幸親祭，改爲省窪谷。」是省窪谷當距唐道不遠，去長平故城亦近，當在高平西北，非正西也。新紀，高宗顯慶五年正月甲子，如并州。己巳次長平。按唐不置長平縣，此長平非故城即關城也。

又按元和志一五，潞州有長子縣在州西南五十二里。寰宇記四五作五十里。又云「廢長平關在（長子）縣南四十里，平嶺上。」以里程計之，是長子縣不當此驛道。

州南二里有金橋，當西通晉蒲大道，亦當南通澤州驛道。

張說皇帝在潞州祥瑞頌十九首（全唐文二二一），其一爲金橋。序云：「金橋在潞南二里，常有童謠云，聖人執節度金橋。皇帝景龍三年十月二十有五日，由此橋朝京師。」頌曰「出郡二里，橫路金橋，聖人南渡，駟馬西朝。」後潘炎有金橋賦（全唐文四四二），序與說頌序略同。則此橋當潞州西通蒲關之路無疑。然廣記二一二金橋圖條：「玄宗封泰山廻，車駕次上黨。……及車駕過金橋，御路營轉，上見數千（十？）里間，旗纛鮮潔，羽衛齊整，謂左右曰，張說言我勒兵三十萬，旌旗經千里間，陝右、上黨，至於太原，眞才子也。……遂召吳道玄……制金橋圖。（出開天傳信記。）」按玄宗以開元十三年東封，未過上黨，此當有誤。考張說上黨舊宮述聖頌序（全唐文二二一）云：「開元十有一祀，正月，皇帝展義於河東，挾右太行，留宴上黨，整兵耀武，入於太原，……南轅汾、睢，祈穀后土。……三月庚午，飲至長安。」通鑑二

一二，開元十年十二月，「上（時在東都）將幸晉陽，因還長安」。張說因上言，宜祠汾陰后土。上從之。十一年正月己巳車駕北巡，庚辰至潞州，給復五年，辛卯至并州。二月戊申還至晉州。壬子，祭后土。癸亥，張說兼中書令。三月至長安。廣記所謂東封泰山，蓋此次北巡之誤。此巡，事與張說有關，亦與廣記稱玄宗之言合，祥瑞頌十九首，蓋亦此時所作耳。惟此行由東都經上黨至太原，非由上黨至蒲、晉，則此橋亦當澤、潞大驛道明矣。橋之位置，張說頌序，潘炎賦序皆云在城南二里。一統志潞安府津梁目，「金橋在長治縣西南關。」

潞州向北有正北及西北兩道。茲先考北道，次及西北道。潞州正北行，道出潞城、屯留間，約十七里至三垂岡，又約二十八里至黃碾（今仍舊名），又北約四十八里至襄垣縣（今縣）。縣南四十里井谷關，亦有天井之名，疑當在此道上。

襄垣縣當晉陽入上黨大道，唐前史事頗多可證。通鑑八七，晉永嘉三年，「（劉）聰遂破屯留長子……上黨太守龐淳以壺關降漢。（并州刺史）劉琨以都尉張倚領上黨太守，據襄垣。」又八九，晉建興三年，「漢大司馬曜攻上黨。八月癸亥，敗劉琨之衆於襄垣。曜欲進攻陽曲。」此其證一。又北齊書神武紀上云：

「神武乃自晉陽出釜口，路逢爾朱榮妻北鄉長公主自洛陽來，馬三百匹，盡奪易之。兆聞……自追神武至襄垣，會漳水暴長，橋壞。……初魏真君內〔中〕學者奏言，上黨有天子氣，云在壺關大王山。……神武行舍大王山六旬而進，將出滏口……。」

按一統志潞安府山川目，「大王山在壺關縣東南二十三里。」元和志，壺關縣在潞州東南三十里。則高歡此行，實由晉陽經襄垣，亦經上黨，始出滏口也。此其證二。下文引冀州圖云：「松門嶺在襄垣北一百三十里，道通太原驛道。」明襄垣固爲大道所經也。故下文引元和志武鄉去潞州里程，亦當取道襄垣，里數始合。

潞州北至襄垣縣九十三里，見元和志及寰宇記。其間行程續考如次。

新五代史五唐莊宗紀云：

「初克用破孟立方於邢州，還軍上黨，置酒三垂岡。……時存勗在側，方五歲，克用慨然……曰，吾行老矣；此奇兒也，後二十年其能代我戰於此乎？……天祐五年，卽王位於太原。……周德威自亂柳還軍太原。梁夾城兵聞晉有大喪，德威兵且去，因頗懈。王……乃出兵趨上黨，行至三垂岡，歎曰，此先王置酒處也。……兵行霧中，攻其夾城，破之。」

舊五代史二七唐莊宗紀述三垂岡之戰云：

「四月……甲子，軍發自太原，已已至潞州北黃碾下營。五月辛未朔晨霧晦暝，帝率親軍伏三垂岡下。詰旦，天復昏霧，進道直抵夾城。……梁軍大恐，……斬首萬餘級。」

按此事，新五代史二二梁臣康懷英傳述之亦詳。（云晉王「與德威等急馳六日至北黃碾。」據舊紀及通鑑，此「北」上蓋脫「潞州」二字。）通鑑二六六梁開平二年書事與月日地名皆從舊紀。惟云「己巳，晉王軍於黃碾，距上黨四十五里。」可補舊紀。胡注，「黃碾村在潞州潞城縣。」「三垂岡在屯留縣東南。」寰宇記四五潞州潞城縣，「三垂山在縣西南二十七里，前趙劉聰遣將喬衷攻晉上黨太守龐和於壺關。晉北將王廣韓柔救之，……喬衷敗之於三垂。」按同目又云，潞城縣在州「東北四十四里。」則三垂岡在州城北約十七里。（元和志作「南至州四十里。」方向小誤，今里數亦從寰宇記。）其北去黃碾當爲二十八里。以次可推黃碾至襄垣里程。國防研究院地圖，長治、襄垣適中地區尚有黃碾地名，當卽故地也。

又元和志襄垣縣目云：「井谷關在縣東南四十里，置在天井谷內，深邃似井，因以爲名。魏武初遷鄆，於此置關，周建德六年廢。」故新志作井谷故關。寰宇記述事與元和志全同，而標目作天井關。按形勢方位論之，當亦在此道上，則在黃碾北不到十里也。

又按潞州至襄垣線，當出潞城屯留兩縣，不經此兩縣城。何者？前引通鑑，黃碾南至潞州四十五里。一統志，黃碾在潞城西北二十里，潞城西南至長治（卽潞州）四十五里，則黃碾南行四十五里，不可能繞經潞城縣。又據一統志，長治東北至潞城四十五里，潞城西北至襄垣七十五里，共一百二十里。又長治西

北至屯留六十里，（元和志作六十四里。）屯留東北至襄垣八十里，共一百四十里。則元和志、寰宇記潞州至襄垣九十三里者，（一統志亦云襄垣在府北稍西五十里。）決不東繞經潞城，或西繞經屯留也。

襄垣東北約三十里至松門嶺，又西北蓋略循濁漳水河谷而上約四十七里至武鄉縣（今縣）。

通鑑一五五，梁中大通四年，「魏丞相歡引兵入滏口，……擊爾朱兆。……歡軍於武鄉，爾朱兆大掠晉陽，北走秀容。」蓋歡此次入滏口擊晉陽，正即上次由晉陽東出滏口之道。是武鄉當此大道也。又通鑑二五五，唐中和三年，「昭義節度使孟立方以潞州……屢篡主帥……乃遷治所於邢州。……監軍祁審誨因人心不安，使武鄉鎮使安居受潛……乞師於李克用……克用……取潞州。」蓋武鄉當晉陽軍道之要，故置鎮使，有事亦得潛乞師於晉陽也。下文引通鑑會昌三年事，亦見武鄉當軍道。又水經洞過水注引魏土地記云，晉陽東南有蔣谷大道通武鄉。尤明證矣。詳下文象谷條。

元和志一五，潞州，鄉縣（即武鄉縣）「東至州一百七十里。」「東」顯爲「南」之譌。如取襄垣道，則襄垣武鄉間近八十里。檢一統志潞安府卷及沁州卷，武鄉在襄垣正北九十五里，與元和志所記尙相近。可證由潞州赴武鄉實取道襄垣；如取他道則迂遠矣。

寰宇記四五潞州襄垣縣目引冀州圖云：「松門嶺在襄垣北一百三十里，道通太原驛路。」按如一百三十里不誤，則其地遠在武鄉縣之北，不應屬襄垣縣。考隋書地理志，松門嶺在上黨郡黎城縣境。檢元和志、寰宇記，黎城縣在潞州治所之東北一百二十里。一統志潞安府古蹟目引舊志，黎城舊縣在今黎城縣西北十里。則黎城縣在襄垣東北不過三四十里。又山川目，「松門嶺在襄垣縣北，接沁州武鄉縣界。」則其地固在武鄉之南，時屬襄垣，時屬黎城也。度其地當在襄垣東北，黎城西北，近濁漳水，當大道。武鄉在襄垣北約七十七里，此嶺蓋在襄垣東北三十里上下歟？則「一百」乃衍文耳。

武鄉縣北七十里至昂車關，蓋因軒車嶺受名。又東北不遠處有石會關（今榆社縣西北二十五里）。皆軍道衝要處。又石會南三十里腰鼓嶺，蓋亦當道。

武鄉、昂車關、石會關，觀會昌間平澤潞昭義之亂時事，最能見其形勢，當大道之要。通鑑二四七，唐會昌三年述事云：

「河東節度使劉迺步騎二千守芒車關，步兵一千五百軍榆社。」「六月……

丙子……詔劉迺自將兵取仰車關路以臨賊境（潞州）。」

通鑑同年下文又書云：

「王宰軍萬善，劉迺軍石會，皆顧望未進。……十二月丁巳，宰引兵攻天井關。……稹……以兵馬使劉公直代茂卿（守澤州），安全慶守烏嶺，李佐堯守雕黃嶺（胡注在潞州長子縣西），郭僚守石會，康良侄守武鄉。……戊辰，王宰進攻澤州，……河東奏克石會關。」

「河東行營都知兵馬使王逢奏乞益榆社兵（按榆社卽指石會關守兵而言，關在縣西二十五里。）詔河東（指太原）以兵二千赴之。」

會太原兵亂，通鑑又書四年事云：

「石會關守將楊珍聞太原亂，復以關降於稹。……王逢擊昭義將康良侄，敗之；良侄棄石會關，退屯腰鼓嶺。」

旋澤潞平，劉稹誅。而五年昭義（卽潞州）復有兵亂，通鑑二四八述之云：

「李德裕奏，請詔河東節度使王宰，以步騎一千守石會關，三千自儀州路據武安，以斷邢洛之路，又會河陽節度使石雄引兵守澤州，河中節度使韋恭甫發步騎千人戍晉州。……皆從之。」（胡注：分守四境，使潞之亂卒不得越逸而奔他鎮。）

又通鑑二八七，後漢天福十二年，劉知遠在晉陽，議進取。下云：

「帝欲自石會趨上黨。」

據此前後書事，昂車、石會兩關，武鄉、榆社兩縣，當太原入潞州軍道之要可知。武鄉、榆社卽今縣。胡注於此數地名或有所釋云：「仰車關卽昂車關。」

「芒車關卽昂車關。魏收地形志，上黨郡沾縣有昂車關。其地當在唐儀州（今遼縣）東（西之譌）南界，石會關之西。」「九域志，遼州遼山縣（今遼縣）有榆社鎮，唐之榆社縣也。（下引宋白說，以爲在襄垣縣理，誤。）」按新志，潞州武鄉縣「北有昂車關。」檢紀要四三武鄉，「昂車關在縣東北七十

里。唐置。」而一統志沁州關隘目，「昂車關在武鄉縣西門外。……縣志，縣西關外有下關村，小漳水所經。相近又有上關村，即古昂車關故址。」兩說相距頗遠。參之新志及下文引一統志石會關條，當以紀要爲近是。縱無七十里之程，但亦決非極近也。一統志此條之說，蓋後代別一關址耳。石會關，胡注以爲在儀州東南。按紀要四三，石會關在榆社縣西北。一統志遼州關隘目，「石會關在榆社縣西二十五里，又西南即沁州武鄉縣之昂車關。」此最分明，與當時形勢亦切合。胡注「東南」蓋「西南」之誤。蓋由武鄉北行至昂車關，又東北不遠至石會關，在榆社縣西二十五里。據一統志遼州卷及沁州卷，武鄉北至榆社約七十里。則紀要云石會關在榆社西北，方位尤確，蓋縣西北二十五里也。

又前引通鑑會昌四年條，康良侄棄石會關退屯腰鼓嶺。考異引實錄，良侄「棄石會關移軍入三十里，守腰鼓嶺。」則石會之南三十里也。若兩關果在一條路線上，則此嶺在昂車之南約二十里也。亦當道。

昂車關，始見於魏書地形志。而下文象谷條引洞過水注轉引魏土地記云，晉陽東南有蔣谷大道，度軒車嶺通武鄉。時代正與昂車關始見史之時代不相遠，疑關因嶺名，蓋在大嶺之南也。此嶺蓋即今黃花嶺，高達二千公尺，詳下文。此關當會昌伐澤潞時屢見通鑑如上述。其後似不復見。（通鑑二六二，天復元年，「叔琮入天井關，進軍昂車。」胡注「昂車即昂車關，在澤州昂車嶺。」此注似誤，且與前引注文自相矛盾。然通鑑下文，叔琮拔澤州，進攻潞州，則此昂車實當在澤州，蓋昂車之名，澤、潞兩州皆有之如天井歟？）而石會關則仍屢見。紀要四三遼州榆社縣石會關條，於會昌以後續述云：

「又光化二年，汴將氏叔琮自馬嶺關西侵河東，爲河東將周德威所敗，引還。德威進之，出石會關；叔琮敗走。五年，朱全忠大舉攻河東，遣其將氏叔琮拔澤州，降潞州，進取晉陽，出石會關，營於洞過驛，攻晉陽不克，叔琮復自石會關引歸。天復二年，叔琮自晉州敗河東兵，長驅圍晉陽，不克，引還。河東將李嗣昭等追及石會關。……唐同光初，梁人謀分道攻唐，以陝虢澤潞之兵自石會關趨太原，不果。清泰三年，契丹救石敬瑭，至太原，圍唐

兵於晉安砦，遊騎至石會關。漢初，以契丹既去汴，議進取之道，漢主欲自石會關趣上黨，不果。周顯德五年，潞州帥李筠擊北漢石會關，拔其六寨。關蓋澤潞北走晉陽之徑道也。」

足見此道在唐末五代當太原潞州間南北交通之要，蓋爲潞州直北第一軍家要地矣。

又西北越軒車嶺（今黃花嶺？）蓋此道最高處，凡約七十三里至象谷，唐以前名蔣谷，故此道有「蔣谷大道」之稱。又北蓋略沿象谷水而下西北行，中經武村堡，約五十二里至太谷縣（今縣）。又北三十七八里至洞過驛，又三十七八里至北都太原府（今晉源縣，舊太原縣，在山西省會太原市西南四十里）。

水經注六洞過水注云：

「魏土地記曰：晉陽城東南一百一十里至山，有蔣谷大道，度軒車嶺，通于武鄉。」

此爲武鄉北達晉陽大道之最具體說明。元和志，太原府太谷縣在府東南七十五里。縣有「蔣谷水，今名象谷水，源出縣東南象谷，經縣北四里，北入清源縣界。」寰宇記四〇，同。（惟云縣在府東南七十八里，小異。）一統志太原府山川目，象谷「在太谷縣東南五十二里，卽古蔣谷。」則此蔣谷大道，當卽略沿蔣谷水，經太谷縣也。隋書四五楊諒傳，諒鎮太原，舉兵，遣大將「余公理出太谷以趣河陽。」卽此道。蓋由晉陽東南行七十五里至太谷縣，循蔣谷水東南行三十五里入山，又蓋十七里至蔣谷卽象谷，又越軒車嶺通武鄉縣也。軒車嶺者，蓋卽昂車關所以受名，疑卽今圖之黃花嶺耳。申報館新地圖，此處高達二千公尺，不惟此道之最高處，且似亦爲汾水以東之最高山嶺也。

又大明一統名勝志，山西一太谷縣：「象谷一云蔣谷，谷中水西北流，武村堡戍，臨之，三面石崖，勢極險阻，唐武德初築。」此堡臨蔣谷水，當爲大道所經也。

至於象谷、石會關之距離。檢一統志，太谷東南至榆社縣一百五十里，而石會關在榆社西北二十五里，象谷在太谷東南五十二里，則石會至象谷約七十三里也。

又舊五代史二六唐書武皇紀：「光化二年……三月，汴將葛從周氏叔琮……進軍榆次，武皇令周德威擊之，敗汴軍於洞過驛。……追擊出石會關。」舊唐書昭宗紀作出石會，攻太原。通鑑二六一，光化二年，氏叔琮進軍榆次，李克用遣周德威擊之，「戰於洞渦，……叔琮弃營走，德威追之，出石會關。」考異引唐太祖紀年錄：「三月，周德威敗氏叔琮於洞渦驛。」胡注引魏收地形志，洞渦水因「五水合流故曰同過，後語轉爲洞渦。」胡氏按云，「魏收多從其主往來晉陽宮，宜知地名之的。」以上光化二年事，知洞渦石會關爲一軍道。又舊五代史二梁書太祖紀，天復元年三月，氏叔琮等伐太原，「自太行路入。」潞州降，「乃進軍趣太原。四月乙卯，大軍出石會關，營於洞渦驛。……卽日與諸軍至〔晉〕陽城下。……以芻糧不給，遂班師。」新五代史四三氏叔琮傳，同略。舊五代史五二李嗣昭傳，只云氏叔琮營洞渦驛。通鑑二六二，天復元年，氏叔琮入天井關，拔澤州，降潞州，「進趣晉陽。夏四月乙卯，叔琮出石會關，營于洞渦驛。……叔琮等引兵抵晉陽城下……數挑戰……李存進敗汴軍於洞渦。時汴軍……芻糧不給……兵還。五月，叔琮等自石會關歸。」此天復元年事，亦見潞州進兵經石會關、洞渦驛至太原城也。（惟舊唐書昭宗紀天復元年述此事云，叔琮由上黨「長驅出圍柏，營于洞渦驛。」作圍柏，不作石會。圍蓋團之形譌，然圍柏似亦誤也。）洞渦驛當此大道無疑。胡注：「洞渦驛，臨洞渦水。」蓋得之。按元和志一三太原府：太原縣，「洞過水東自榆次縣界流入，西去縣三十里入晉陽縣界。」晉陽縣，「洞過水東自太原縣界流入，西入於汾，晉水下口也。」則此水在太原府南不過三四十里。紀要四三，榆社縣石會關條，「洞過驛在今徐溝縣。」一統志太原府關隘目：「同戈驛在徐溝縣北關外，西隅，卽洞渦字之譌也。」所指地望甚確。檢一統志，太原府治陽曲縣（卽今山西省會），太原縣（民國三十六年改名晉源縣）在府治西南四十里。徐溝縣又在其南四十里。太谷又在徐溝之南四十三里。故徐溝縣適在太原太谷兩縣之中道。唐太原府治所在一統志之太原縣，詳一統志太原府卷沿革目太原縣條。民國三十六年改名爲晉源縣，見民國行政區域簡表。故唐洞渦驛亦當太原府至太谷縣之中道。元和志，太谷縣在府東南七十五里，則此驛北至

府，南至縣皆約三十七八里也。

又由潞州西北行經銅鞮縣亦至太原府，此爲另一道，且置驛。蓋卽略當今日之汽車道也。

史記韓王信傳，信「反，以馬邑降胡，擊太原。七年冬，上自往擊破信軍銅鞮。」是漢世銅鞮北當太原軍道。又縣東南十五里有晉銅鞮宮，漢銅鞮城，西北二十里有閼與故城，皆古代名地。（詳後文。）似亦可爲當道之證。又魏書二一下彭城王勰傳，「後幸代都，次于上黨之銅鞮。」是北朝時代洛陽北至太原亦經銅鞮也。通鑑二五八，唐大順元年，「昭義有精兵號後院將，克用……令李克恭選後院將尤驍勇者五百人，送晉陽。……克恭遣牙將李元審及小校馮霸部送晉陽，至銅鞮，霸招其衆以叛。」是唐世潞州至晉陽亦經銅鞮也。然元和志一五，潞州目，銅鞮東至州一百五十里（當作東南）。唐世武鄉縣在州北一百七十里。檢一統志沁州卷，武鄉在沁州東北六十里，而唐之銅鞮又在沁州之西南四十里，則唐世銅鞮去武鄉無論如何皆當在六七十里以上，今元和志所記兩縣至潞州之距離僅有二十里之差，知其必非一道也。

其驛程可考者，潞州西行二十里至高河，相近有龍泉驛，爲潞州西通晉絳之第一驛，蓋亦爲西北通銅鞮、太原之第一驛。又西北六十里至太平驛。又西北三十里至梁侯驛。又四十里至銅鞮縣（今沁縣西南四十里之故縣鎮）。

通鑑二八〇，後晉天福元年，唐將趙德鈞屯團柏，晉帝由晉陽南下向洛陽。「丁卯，至團柏。」德鈞先遁，「南奔潞州」。「甲戌，帝與契丹主至潞州，德鈞父子迎謁於高河。」按團柏在今祁縣東南，是趙德鈞撤退線及晉帝進軍線，皆當行銅鞮道也。而高河當晉陽、團柏、銅鞮至潞州道。又二六六，後梁開平元年，「晉周德威壁于高河」，敗梁潞州行營都統。胡注：「高河在潞州屯留縣東南。」一統志潞安府關隘目，「高河鎮在長治縣西二十里，卽古絳河也。」是則潞州西行二十里，至高河，乃西北至銅鞮、太原也。今日汽車道正如此。又通鑑二四七，唐會昌三年，劉稹欲自爲昭義節度。「上遣供奉官薛士幹往諭指。……士幹入境，……都押牙郭誼乃大出軍，至龍泉驛迎候敕使，請用河朔事體。」一統志潞安府關隘目，「龍泉驛在長治縣西二十里，以龍潭水

名。唐置，今廢。」是此驛當西通晉絳之道。然亦在潞州西二十里，與高河必相近。蓋潞州西北至銅鞮、太原，亦以此驛爲起站歟？

通鑑二九一周顯德元年紀云：

「北漢主自將兵三萬……與契丹自團柏南趣潞州。……北漢兵屯梁侯驛，昭義節度使李筠遣其將穆令均將步騎二千逆戰，筠自將大軍壁於太平驛。」此條見晉陽潞州交通線上之地名者三。胡注：「宋白曰，梁侯驛在團柏谷南，太平驛西北。太平驛東南距潞州八十里。」太平驛在潞州西北。而團柏谷在祁縣東南。（詳下文。）則此道當爲銅鞮道，非武鄉道也。太平驛始見於會昌間。新書一八二盧鈞傳，澤潞既平，遷昭義節度，發卒戍代北（通鑑作振武），「戍卒……酒酣，反攻城……鈞奔潞城。……鈞……還府。詔趣戍者行。……戍人已去潞一舍，鈞選牙卒五百，壯騎百，以騎載兵夜趨，遲明（通鑑作明日）至太平驛，盡斬之。」通鑑二四八唐會昌五年紀書事，略同。又云「盧鈞出至裴村餕之。」潞卒亂。蓋城外村名也。胡注：「唐制三十里一驛，太平驛在潞州北六十里。宋白曰，太平驛東南距潞州八十里。」按里距方向，蓋以宋白說爲正；胡氏州北六十里之說，蓋憶測之詞耳。紀要四二亦從宋白說。一統志潞安府關隘目：「太平驛在長治縣西北太平鄉，唐置今廢。」梁侯驛惟此一見。一統志潞安府關隘目太平驛條引續通典云：「梁侯驛在上黨西北一百十里。」紀要四二，同。是即太平驛西北一驛耳。

元和志一五，銅鞮縣東至潞州一百五里。東當作東南。則當在梁侯驛西北四十里也。檢一統志沁州古蹟目引縣志：「唐銅鞮故城在州西南四十里，今爲故縣鎮，有故縣寨。」又山川目，「銅鞮山在州西南四十里。」蓋故城近山。參下文亂柳條。今圖有故城鎮，一作古城鎮，在沁縣西南，殆其地。

又由高河西北四十四里至屯留縣（今縣）。又十八里至余吾寨（今余吾鎮）。又北約八十里亦至銅鞮。

通鑑二六六，後梁開平元年，晉將李嗣昭守潞州，梁將康懷貞圍攻之。八月，「晉周德威壁于高河……帝以……李思安代懷貞爲潞州行營都統。……思安至潞州城下，更築重城，內以防奔突，外以拒援兵，謂之夾寨。」二年又書云：

「正月……晉王……病篤，周德威退屯亂柳……李思安等攻潞州，久不下。……晉兵猶屯余吾寨。……三月……帝發大梁，……次澤州。四月……夾寨奏余吾晉兵已引去，帝以援兵不能復來，潞州必可取。丙午，自澤州南還。」  
 胡注：「漢書地理志，上黨郡有余吾縣。章懷太子賢曰，余吾故城在潞州屯留縣西北。」檢一統志潞安府古蹟目：「余吾故城，後漢書郡國志，屯留縣。劉昭注有余吾城，在縣西北三十里。縣志，在縣西十八里，城周九里，故址猶存。今爲鎮。」又關隘目：「余吾驛在屯留縣城內。舊在縣西北十八里余吾故城。」今申報館中國新地圖，屯留縣北有余吾鎮。（國防研究院地圖，屯留西北有吾元地名，疑乃余吾之倒譌。）據此條，屯留、余吾皆當在道上。元和志一五，屯留在潞州西北六十四里。寰宇記四五，同。余吾卽與太平驛相近矣。然前人注釋皆只云太平驛在長治縣西北八十里，不云在屯留西北。又前舉近代兩地圖，長治通沁縣大道亦不經屯留、余吾，而申報館圖則長治、屯留、余吾、沁縣另有小道。復檢元和志，潞州西北至銅鞮一百五十里。而寰宇記五〇，威勝軍（卽銅鞮縣）「南至屯留縣一百四十三里。」此當指移縣於今沁縣地而言，在唐銅鞮東北四十里，則唐銅鞮在屯留北約一百里有餘。是銅鞮經屯留至潞州約一百六十五里有餘也。又九域志四，威勝軍「南至本軍界八十五里，自界首至潞州八十里。」「東南至本軍界五里，自界首至潞州一百四十里。」此東南至潞州里數正與元和志合。而南至潞州里數，又與寰宇記南經屯留之里數相合。故知今日兩道，卽唐宋之兩道也。今日主道在屯留之東，不經縣城；唐世已然。

銅鞮南有銅鞮故宮，西北有闕與故城，皆春秋戰國時之名所，蓋亦因地處衝要之故。  
 元和志一五潞州銅鞮目，「晉銅鞮宮在縣東（一統志沁州卷引作東南）十五里，子產曰，今銅鞮之宮數里。」「闕與城在縣西北二十里。史記曰，秦昭襄王攻趙闕與。趙奢曰，其險狹，譬如兩鼠鬥於穴中，將勇者勝。遂破秦軍，解闕與之圍。」寰宇記五〇威勝軍銅鞮縣：「銅鞮城在縣南十五里，本晉銅鞮宮，在縣南十五里。上黨記云，銅鞮有晉宮闕猶存。」「闕與城今名烏蘇城，在縣西北二十里。」又引冀州圖，「烏蘇城在縣西北二十里。」按一統志沁州

古蹟目，「銅鞮宮在州南。」「烏蘇城在州西南二十里，今名烏蘇村。」蓋唐縣之西北，正當今沁縣之西南，唐縣之東或東南，正當今沁縣之南也。

銅鞮東北四十（三十？）里至亂柳（今沁縣阿近），蓋卽斷梁城。

新五代史二二梁書康懷英傳，懷英圍晉之潞州，築夾城。「晉遣周德威屯于亂柳，數攻夾城。」前條引通鑑，晉王病篤，「周德威退屯亂柳。」胡注：「亂柳在潞州屯留縣界。」而一統志沁州古蹟目，「威勝故軍，今州治。……五代時地名亂柳，在唐銅鞮縣東北三十里。宋置威勝軍於此，兼移銅鞮縣治焉。金時升爲沁州。」是與胡注地望相去頗遠。按宋史八六地理志，威勝軍「太平興國三年於潞州銅鞮縣亂柳石圍中建爲軍。」則一統志是也。（前引一統志，唐銅鞮在今沁縣西南四十里，此又似當爲三十里，爲小異。）胡注蓋以意言之。蓋就形勢而言，亂柳似正當在屯留縣境耳。

元和志一五，銅鞮縣有「斷梁城」，在縣東北三十里，下臨深壑，東西北三面阻澗，廣袤二里，俗謂之斷梁城。寰宇記五〇，同。一統志沁州古蹟目：「上虒亭在州城東南，一名斷梁城。漢書地理志，銅鞮縣有上虒亭。水經注，銅鞮水又東逕故城北，城在山阜之上，下臨岫壑，東西北三面阻袤二里，世謂之斷梁城，卽故縣之上虒亭也。」則上虒亭俗名斷梁城，在今沁縣附近。與前舉亂柳相近，就形勢言，又頗相似，音亦相近，疑爲一地耳。一統志同目銅鞮故城條又云：「舊志有段柳寨，在州南十五里，疑卽亂柳之訛。」尤一名通變之徵矣。又西北六十里至西唐店（今有西陽鎮）。又約八十里左右（七十至九十里）中踰護甲嶺（今名分水嶺）至團柏（祁縣東南六十里）。又北約十里至盤陀嶺，北齊置盤陀驛，唐蓋仍之。又北約九十餘里至晉安寨，又三十餘里至太原府。

通鑑二八〇，後晉天福元年，唐兵軍晉安寨，爲石敬塘及契丹所圍，唐帝詔幽州趙德鈞進軍河東。並遣其子樞密使「趙延壽將兵二萬如潞州」，使與德鈞會師。帝自至懷州，以康思文爲北面行營馬軍都指揮使，「帥扈從騎兵赴團柏谷。」十月「趙德鈞……至鎮州……自吳兒谷趣潞州。癸酉，至亂柳。……十一月……辛卯，……趙延壽遇趙德鈞於西湯，悉以兵屬德鈞。……德鈞逗留不進，詔書屢趣之，德鈞乃引兵北屯團柏谷口。……德鈞……至團柏踰月，按兵

不戰，去晉安纔百里，聲問不能相通。」旋晉安兵潰，晉帝與契丹引兵南下，「至團柏與唐兵戰。」趙氏父子遁歸潞州。按此段紀事，見亂柳向北經西湯，至團柏，團柏去晉安寨百里。胡注：「歐史，西湯作西唐，薛史作西唐店。」檢一統志沁州關隘目：「西湯鎮在州西少北，即古西唐店。……（引通鑑）」。九域志，銅鞮縣有西湯鎮。縣志，鎮在州西北六十里，因西湯水爲名。」按水經注一〇濁漳水注，有西湯水。楊氏圖即繪水源於此地區（沁縣北偏西），店因水受名，是也。又一統志太原府關隘目：「團柏鎮在祁縣東南六十里。……金史地理志，祁縣有團柏鎮，亦曰團柏谷。」「晉安寨在太原縣故晉陽城南，亦曰晉安鄉。史略注，晉安寨，太原縣西南三十餘里，晉祠南。」是前後里數可略知。惟西唐至團柏里距無考。檢一統志太原府沿革目及沁州沿革目，武鄉、祁縣相距二百四十里，則沁縣至祁縣當在二百里左右，推知西唐店至團柏當在八十里上下，蓋七十里至九十里也。

水經注六汾水注：「侯甲水……發源祁縣胡甲山，有長坂，謂之胡甲嶺，即劉歆遂初賦所謂越侯甲而長驅者也。蔡邕曰，侯甲亦邑名也，在祁縣。」楊氏水經注圖繪此嶺於西湯西北，祁縣東南。寰宇記五〇，武鄉縣有「侯甲山，今名護甲嶺。」下引酈注以實之。是唐世名護甲嶺也。蓋此地區有西湯水南流入濁漳水，胡甲水西北流入汾水。此嶺則二水之分水嶺也。檢一統志沁州山川目，「胡甲山在武鄉縣西北一百里。」又關隘目，「南關在武鄉縣西北一百二十里。」則嶺在南關之南二十里。又檢申報館新地圖「西湯西北，南關之南有分水嶺，蓋其地歟？」

元和志太原府，祁縣北至府一百里。一統志太原府，祁縣在府南少西一百四十里。按唐太原府在清太原府西南四十里，故二書所記里距實相合。此道如經祁縣，則團柏至晉安寨當一百二十餘里。通鑑云纔百里，或舉約數；或不經祁縣城，而經祁縣東區，取較直路線也。觀今日公路，（國防研究院地圖已作鐵道。）實不經祁縣，而經縣東，蓋古道已然。

今山西祁縣有北齊天統四年造像，云：「天統四年三月十五日，佛弟子太原郡功曹王鸞、槃陀驛將張貴和……。」（燕京學報第十八期馬鑑山西佛窟考察）

記。)是北齊太原郡境有槃陀驛，考且或即在祁縣境。宋史三四九姚吉傳：「粘罕陷隆德府，以古爲河東制置，……總兵援太原。……粘罕圍太原，內外不相通。古進兵復隆德府、威勝軍，扼南北關，與金人戰，互有勝負，太原圍不解……金人進兵迎古，遇于盤陀，古兵潰。」(此條據一統志檢。)按隆德府即唐之潞州，威勝軍在唐之銅鞮縣東北。一統志太原府關隘目：「盤陀鎮在祁縣東南五十里。」則當在團柏北十里。北齊槃陀驛正當在所處。檢申報館新地圖，沁縣北行公路上以次有西湯、南關，盤陀，即因古道耳。又考李德裕有盤陀嶺驛樓詩云：「嵩少心期杳莫攀，好山聊復一開顏，明朝便是南荒路，更上層樓望故關！」此詩如爲德裕所作，似非此槃陀驛：蓋彼雖爲趙郡人，但重貶前似無緣到太原地區也。然祁縣之槃陀既早在北朝已置驛，迄宋仍爲當道要地，唐代仍承北朝置驛固宜，不因作者之可疑而廢此詩也。

太原府，唐置北都，故有都亭驛。

令孤楚奏太原府資望及官吏選數狀(全唐文五四二)：「太原府，龍興盛業，……官標留守，驛署都亭。」是唐世太原置都亭驛也。又新五代史三八宦者傳：「及（唐）明宗入主，又詔天下悉捕宦者而殺之。宦者……亡至太原者七十餘人，悉捕而殺之都亭驛。」是五代之世仍承之。

綜上所考，此道由洛陽東北渡河陽大橋至懷州。又略循丹水河谷而上入太行陘，度入白水河谷，越太行山脊之天井關至澤州。復略循丹水河谷至高平，達潞州，去洛陽四百七十里。河陽、太行爲洛陽以北之雙重天險，爲軍家角逐之目標，故在中國軍事史上極關重要。潞州正北行，經襄垣、武鄉兩縣，昂車、石會兩關，越軒車嶺，取蔣谷大道，經太谷縣至太原府四百四十餘里，或五十餘里。此道大抵循濁漳水（東源）河谷而上，踰嶺，復沿循象谷水而行也。又由潞州西北行，經太平、梁侯等驛，銅鞮縣，斷梁城，西塘店，踰護甲嶺，經團柏至太原府，四百五十多里。北道大抵循濁漳水北源，踰嶺，復沿循今昌原河（國防研究院地圖）而行也。兩道路程，皆四百五十里上下，唐宋志書，潞州至太原府四百五十里，無異說，此兩道皆可當之。惟銅鞮道置驛，武鄉道似不置驛，蓋軒車嶺較高險歟？然軍事進出武鄉道似反較銅鞮道爲多，何耶？豈險隘地區正兵家競逐用奇之目標歟？

民國五十八年七月十七日初稿。五十九年四月二十日修訂。九月八  
日校畢，增訂槃陀驛一條。



